



## শিক্ষা

### সৈয়দপুর ডিগ্রী কলেজের সমস্যা

উত্তরাঞ্চলের জনবহুল ও শ্রমিক প্রধান শহর সৈয়দপুরে ১৯৫৩ সালে স্থানীয় শিক্ষানুরাগী ব্যক্তিদের সক্রিয় সহযোগিতায় একটি পুরনো ভবনে সৈয়দপুর কলেজটি স্থাপন করা হয়। পরবর্তীতে বিভিন্ন ব্যক্তি কর্তৃক দানকৃত নিজস্ব জমিতে এটির দ্বিতল

ভবন নির্মাণ করা হয়। এ কলেজের কক্ষ সংখ্যা মোট ২৮টি এবং ছাত্র-ছাত্রী সংখ্যা প্রায় ১৫শ'। অন্যান্য প্রশাসনিক কাজে নিয়োজিত মোট ২১ জন কর্মচারী ছাড়াও শিক্ষক-শিক্ষয়ত্রী রয়েছেন মোট ২৯ জন। ছাত্র-ছাত্রীদের বেতন ছাড়া বর্তমানে কলেজটির কোন আয়ের উৎস নেই। কলেজটিতে কলা, বিজ্ঞান ও

বাণিজ্যসহ সকল বিভাগের ডিগ্রী পর্যায়ের ক্লাস আছে। এখানে সবচেয়ে বড় সমস্যা শ্রেণীকক্ষ ও ছাত্রাবাসের। কলেজের ছাত্রাবাসটি দিনাজপুর সড়কের পাশে একটি পুরনো পরিত্যক্ত বাড়িতে অবস্থিত। দীর্ঘদিন যাবত কোন সংস্কার না করায় যে কোন মুহূর্তে এটির ধসে পড়ার আশংকা রয়েছে। প্রয়োজনীয় সংখ্যক আসন না থাকায় গ্রাম ও দুরাঞ্চলের

ছাত্র-ছাত্রীরা শিক্ষার সুযোগ থেকে বঞ্চিত হচ্ছে। ল্যাবরেটরীতে পর্যাপ্ত যন্ত্রপাতির অভাব দীর্ঘদিনের। রাজশাহী বোর্ডের আওতাধীন এই কলেজটি অতীতে দু'বার সরকারীকরণের প্রস্তাব থাকা সত্ত্বেও তা বাস্তবায়িত হয়নি। অথচ এ কলেজটিকে সরকারীকরণের দাবী এলাকাবাসীর দীর্ঘদিনের।

— আবদুল হালিম তাপ